

Morning Dogri (NSD) National News Bulletin 05-08-2024

आकाशवाणी

खबरां शगुपता चौधरी कोला।

1. प्रधानमंत्री नरेन्द्र मोदी होरें मुल्खै च गैस दे रिकार्ड उत्पादन दी सराहना कीती ऐ।
2. हरियाणा सरकार नै सब्बने फसलें गी घट्टोघट्ट समर्थन मुल्ल पर खरीदने दी घोषणा कीती ऐ।
3. राष्ट्रपति द्रौपदी मुर्मू होर त्रुं मुल्खें फिजी, न्यूजीलैंड ते तिमोर लेस्ते दे दौरें पर रवाना।
4. विदेश मंत्रालय नै बंगलादेश दे मजूदा हालात दी पछोकड़ै च भारतीय नागरिकें गी बंगलादेश नेई जाने दी सलाह दित्ती ऐ।
5. ओलंपिक्स च अज्ज भारत दे लक्ष्य सेन बैडमिंटन सिंगल्स च कैह दे तगमे लेई खडगन।
6. क्रिकेट च कल भारत ते श्रीलंका बश्कार मजूदा श्रृंखला दे दुए मैच च श्रीलंका नै भारत गी 32एं रंजें कन्नै हराई दित्ता।

<><><><><><>

PM Gas

प्रधानमंत्री नरेन्द्र मोदी होरें देसै च रिकार्ड गैस उत्पादन दी सराहना कीती ऐ ते आखेआ ऐ जे विकसित भारत दे संकल्प गी हासल करने आस्तै ऊर्जा खेत्तर च आत्मनिर्भरता बड़ी मती महत्वपूर्ण ऐ। प्रधानमंत्री होरें एह गल्ल पेट्रोलियम मंत्री हरदीप सिंह पुरी हुंदी इक पोस्ट दे जवाब च आकखी ऐ जेह्दे च दस्सेआ गेआ ऐ जे देशै नै गैस उत्पादन दे खेत्तर च इक नमां रिकार्ड हासल कीता ऐ। ब'रे 2020–21 च गैस दा उत्पादन 28.7 बीसीएम हा ते ब'रे 2023–24 च एह बधियै 36.4–3 बीसीएम होई गेआ ऐ। केन्द्रीय मंत्री होरें सांझा कीते गेदे आंकड़े च अंदाजा लाया गेआ ऐ जे 2026 च गैस दा उत्पादन 45.3 बीसीएम होई जाग। सोशल मीडिया दी इक पोस्ट च श्री मोदी होरें इस उपलब्धि लेई देश दे लोकें गी बधाई

दित्ती ऐ। उनें आखेआ जे गैस उत्पादन च एह रिकार्ड इस दिशा च साढ़ी प्रतिबद्धता गी दर्शादा ऐ।

<><><><><><>

Hariyana CM

हरियाणा दे मुख्यमंत्री नायब सिंह सैनी होरें राज्य च सब्बने फसलें दी घट्टोघट्ट समर्थन मुल्ल एम.एस.पी पर खरीद दी घोषणा कीती ऐ। कुरुक्षेत्र च बीजेपी दी “विजय शंखनाद रैली” गी संबोधत करदे होई सैनी होरें आखेआ जे राज्य सरकार मजूदा समें च एम.एस.पी पर 14 फसलें दी खरीद करै करदी ऐ। उनें आखेआ जे राज्य सरकार नै 133 करोड़ रपे दे बकाया नहर जल सिंचाई शुल्क, जिसी अबियाना दे नां कन्नै जानेआ जंदा ऐ, गी माफ करने दा बी फैसला लैता ऐ। मुख्यमंत्री होरें आखेआ ऐ जे बीजेपी सरकार नै “अबियाना” बवस्था गी बंद करने दा फैसला लैता ऐ जेह्दे नै करसानें गी हर बरें 54 करोड़ रपे दा फायदा पुज्जोग। सैनी होरें 2023 कोला पैहले रोहतक, नूंह, फतेहाबाद ते सिरसा च कुदरती करोपिणं कारण फसलें गी नुक्सान पुज्जे दे करसानें गी इक हफ्ते दे अंदर 137 करोड़ रपे दे बकाया रौह्दे मुआवजे दा भुगतान करने दी बी घोषणा कीती ऐ।

<><><><><><>

President Visit

राष्ट्रपति द्रौपदी मुर्मू होर त्रै देशें फिजी, न्यूजीलैंड ते तिमोर लेस्ते दी यात्रा पर रवाना होई गेदियां न। यात्रा दे पैहले चरण च ओह अज्जै थमां 7 अगस्त तगर फिजी दा दौरा लांगन। विदेश मंत्रालय नै आखेआ ऐ जे इस यात्रा कन्नै दौनें मुख्यें दे ऐतिहासक सरबंधें गी होर मजबूती थहोग। राष्ट्रपति मुर्मू फिजी दे राष्ट्रपति कैटोनीवेर ते प्रधानमंत्री सितिवेनी राबुका कन्नै बैठक करगंन। राष्ट्रपति मुर्मू होर फिजी दी संसद गी संबोधत करगंन ते उत्थें भारतीय प्रवासिणं कन्नै बी गल्लबात करगंन। भारत विकास खेत्तर च फिजी दा सशक्त भागीदार रेआ ऐ। राष्ट्रपति मुर्मू यात्रा दे दुए गेड़ च 8 ते 9 अगस्त गी न्यूजीलैंड दा दौरा लांगन। उत्थें ओह गवर्नर जनरल सिंडीकिरो कन्नै बैठक करगंन ते प्रधानमंत्री क्रिस्टोफर लक्सन कन्नै मलाटी करगंन। उत्थें ओह वेलिंग्टन च अंतराष्ट्रीय शिक्षा सम्मेलन गी संबोधत करगंन ते आकलैंड च बी भारतीय प्रवासिणं कन्नै मलाटी करगंन। खीरी गेड़ च 10 अगस्त गी तिमोर

लेस्ते दा दौरा लांगन ते राष्ट्रपति जोसे रामोस होर्ता कन्ने दपक्खी बैठक करगंन। राष्ट्रपति मुर्मू होर तिमोर लेस्ते दे प्रधानमंत्री के. राला गुसमाओ कन्नै बी मलाटी करगंन।

<><><><><><>

Bangladesh

विदेश मंत्रालय नै बंग्लादेश च जारी घटनाएं गी दिक्खदे होई भारतीय नागरिकें गी अगली सूचना थोने तगर उत्थूं दी यात्रा नेई करने दी हिदायतां दित्तियां न। मंत्रालय नै इक सलाह जारी कीती ऐ जे बंग्लादेश च सब्बने भारतीय नागरिकें गी मती सावधानी बरतने ते कुतै बी बाहर जाने थमां बचने लेई आखेआ ऐ। उनेंगी आपात कालीन फोन नंबर उप्पर ढाका च भारतीय उच्चायोग दे संपर्क च रौहने लेई आखेआ गेआ ऐ। नंबर नः—8801958383679, 8801958383680 ते 8801937400591 पर संपर्क कीती जाई सकदी ऐ।

<><><><><><>

Nepal

नेपाल दे प्रधानमंत्री के.पी.शर्मा ओली नै भारत कन्नै कनैक्टिविटी बधाने आस्तै नेपाल दे पानी आले रस्ते ते रेलवे गी विकसित करने दा आह्वान कीता ऐ। बुनियादी ढांचा ते ट्रांसपोर्ट मंत्रालय दे तैहत् शिड़कें सरबंधी मैहकमें दी प्रगति समीक्षा बैठक च श्री ओली नै सिविल सेवकें गी भारतीय बन्ने दे नेड़े हनुमाननगर थमां त्रिवेणी ते देवघाट तगर स्टीमर सेवाएं दे निर्माण आस्तै इक योजना दा मसौदा तैआर करने दा निर्देश दित्ता ऐ। उनें आखेआ ऐ जे 1970 थमां नेपाल च स्टीमर सेवाएं दी इजाजत देने आले कनून होने दे बावजूद बी इस्सै नेह बुनियादी ढांचे दा इस्तेमाल नेई कीता गेआ हा जेह्ड़ी बदकिस्मती ऐ। पानी आले रस्ते राएं माल ते लोकें दी आओजाई दे सखल्ले माध्यम पर जोर दिंदे होई श्री ओली होरें अधिकारिण गी देशै च तौले गै स्टीमर संचालित करने दी योजना पर कम्म करने दा निर्देश दित्ता ऐ। उनें नेपाल दी रेलवे सेवाएं दे विस्तार दी जरूरते पर जोर भरेआ ते मजूदा जनकपुर—कुथां रेलवे लाईन च दऊं रेल लाइनां जोड़ने दा आह्वान कीता ऐ। श्री ओली होरें नेपाल च इक पूर्व—पच्छिम रेल लाइन दे विकास दा बी प्रस्ताह रखेआ ऐ जे एह्दे कन्नै नेपाल दे रस्ते गुवाहटी थमां दिल्ली ते सिलीगुड़ी थमां हरिद्वार तगर यात्रा करने आले भारतीय लोकें गी बी फायदा हासल होग।

<><><><><><>

SEN Medal

पैरिस ओलंपिक्स बैडमिंटन सिंगल्स च अज्ज कैह दे तगमे लेई भारत दे बैडमिंटन खडारी लक्ष्य सेन दा मकाबला मलेशिया दे जी जिया ली कन्नै होग। भारतीय समे दे मताबक एह मैच संजा 6 बजे शुरू होग। कल सैमीफाइनल मकाबले च लक्ष्य सेन गी डेनमार्क दे विक्टर एक्सेलसेन कोला हार दा सामना करना पेआ हा। ओलंपिक्स दे सैमीफाइनल च पुज्जने आले, लक्ष्य सेन पैहले भारतीय बैडमिंटन खडारी न। अजे तोड़ी शड़ियां दऊं महिला भारतीय खडारन साइना नेहवाल ते पी.वी.सिंधु नै भारत लेई तगमा जित्ते दा ऐ।

<><><><><><>

Cricket India-Srilanka

भारत ते श्रीलंका बश्कार खेड्डी जा'रदी त्रै इक दिने आली अंतराष्ट्रीय श्रृंखला क्रिकेट मैच च कल भारत गी हार दा सामना करना पेआ ऐ। कोलंबो दे प्रेमदासा स्टेडियम च कल खेड्डे गेदे मैच च श्रीलंका नै भारत गी 32एं रंजे कन्नै हराई दित्ता। 241 रंजे दे लक्ष्य दा पिच्छा करदे होई भारत नै 42 ओवरें ते दो गेंदे च 208 रंज बनाइयै ऑल आउट होई गे। कप्तान रोहित शर्मा नै 44 गेंदें च 64 रंज बनाए, पर होरने खडारिएं दा प्रदर्शन किश संदोख जनक नेई रेआ। श्रीलंका दे जेफरी वांडरेस नै 6 विकेटां हासल कीतियां ते उनेंगी मैच ऑफ द मैच घोषत कीता गेआ। श्रीलंका नै पैहले बल्लेबाजी करदे होई 50 ओवरें च 9 विकेटें दे नुकसान उप्पर 240 रंज बनाए हे। वाशिंग्टन सुंदर नै त्रै ते कुलदीप यादव नै दो विकेटां लैतियां। इस जित्त कन्नै श्रीलंका श्रृंखला च 1-0 कन्नै अगगे होई गई ऐ ते पैहला मैच दोनो बश्कार टाई पर समाप्त होआ हा।

<><><><><><>

Olympic Tickets

केन्द्र सरकार नै पैरिस ओलंपिक्स पर इक यादगारी टिकट जारी करने दी घोषणा कीती ऐ। इक सोशल मीडिया पोस्ट च मैहकमा डाक नै आखेआ जे इनें यादगारी टिकटें दा सेट अज्ज जारी कीता जाग। केन्द्री संचार मंत्री ज्योतिरादित्य सिंधिया ते युवा मामले ते खेड्ड मंत्री डॉ. मनसुख मांडविया होर इस मौके पर मजूद रौहगन। संचार मंत्रालय नै दस्सेआ ऐ जे ओलंपिक्स पर यादगारी टिकट जारी कीता जाना खडारिएं ते खेड्डे लेई भारत दे उत्साह ते समर्थन दा प्रतीक ऐ।

<><><><><><>

IOC

अंतर्राष्ट्रीय ओलंपिक समिति यानि आईओसी नै पिछले ब'रे वर्ल्ड चैंपियनशिप च अंतर्राष्ट्रीय मुक्केबाजी संघ आस्सेआ दऊं महिला खडारिएं आस्तै लिंग परीक्षण गी गैर कनूनी ते विश्वासनीयता थमां परे दस्सेआ ऐ। आईओसी दे प्रवक्ता मार्क एडमस नै इनें परीक्षणें दी सख्त नुक्ताचीनी करदे होई दस्सेआ ऐ जे एह जांच ते जांच प्रक्रिया पूरी चाल्ली नै गलत ही, वीरवारें पैरिस ओलंपिक महिला मुक्केबाजी च एंजेला कैरिनी दे खलाफ प्रदर्शन दे मगरा एह विवाद होर गैहरा होई गेआ। खेलिफ दे जोरदार पंच दे मगरां कैरिनी गी सिर्फ 46 सकिंटें दे अंदर-अंदर गै मैच छोड़ना पेई गेआ हा। कैरिनी गी पुरस्कार दे तौरा पर 50 जहार डॉलर देने दी अंतर्राष्ट्रीय बाक्सिंग संघ दी घोशणा दे मगरा आईओसी कन्नै चला'रदे विवाद होर तेज होई गे। बघदे तनाह दे चलदे आईओसी दे प्रमुख थॉमस बाश नै बाक्सिंग संघ पर आईओसी गी बदनाम करने दा आरोप लाया ऐ।

<><><><><><>

L.S-Today

लोकसभा च अज्ज सेहत ते परिवार कल्याण मंत्रालय दी 2024-25 ब'रे दिएं ग्रांट मंगें पर अग्रे चर्चा होग। गोवा राज्य विधानसभा क्षेत्र सरबंधी अनुसूचित जनजाति दे नुमायंदगी बारे बिल गी बी अज्ज सदन च रखे जाने दी मेद ऐ। तोआई राज्यसभा च तेल क्षेत्र ते विनियम ते विकास सरबंधी तरमीमी बिल 2024 गी सदन च रखेआ जाग। उपरले सदन च राई-बाई मंत्रालय दे कम्में काजें पर चर्चा कीती जाग।

<><><><><><>